

01.10.2025

Naleraq

UKA2025/31

Gerth MikaelSEN

**Namminersorlutik Oqartussat sakkut pillugit inatsimmik allannguinnissamut
siunnersuummik atuutsitsilernissaat pillugu Inatsisartunut aalajangiiffigisassatut
siunnersuut (Aallaasinik il.il. pigisaqarnissamut ukiunik killiliineq kiisalu aallaasinik
inissiivinnik piumasaqaat)**
(Aalisarnermut, Piniarnermut, Nunalerinermut Imminullu Pilersornermut Naalakkersuisoq)

Siullermeerneqarneranut oqaaseqaat:

Uani oqaaseqaatitsinni nunatta ataqqinartut piniartuinut, kiisalu pinialuttartunut tamanut eqquisussaq eqqartorpagut, ilaqutariippassuarnullu, kiisalu piorsarsimassutsimut tunngasut eqquisussaq eqqartorlutigu.

Tassani eqqaaneqarsinnaasut tassaallutik ukiut 12-niit 15-nut inatsimmi allannguerusullutik naalakkersuisut isummerput aallaniarnermut inatsit allanngortinneqarnerata kingunerisaanik, tassani inatsimmi 12-nik ukiullit kisimi piniakkanut killilersuuteqanngitsunut isiginiarneqarput pisaqarsinnaanissai ingiallorteqarlutik, taavalu 15-niit ukiullit piniakkanut killilersukkanut pisaqarsinnaanissai killilerneqarlutik.

Uani allannguinermi aamma eqqaaniarneqarpoq pinerluttulerinermi inatsit ilaatinneqassasoq, tassa pineqaatissiinnaaneq, ingiallorteqarnak piniarsimaguit, imaluunniit Ataatat ilaangippat unnerluutigineqarsinnaavutit. Taavalu tassani aamma inatsit atuutsilerpat inuppassuit nalunanngitsumik qallunaatut taallugu Kriminal-inngortinneqartussat amerlasuusussaapput. Ilaqutariinni ukiorpassuarni piniartoqarfinni peroriartorsimasuni piorsarsimassuseq ukiorpassuarni ingerlasimasoq aammaarluni inuiannut kalaallinut killileerujussuassaaq.

Kiisalu pigisanut aallaasinut tunngatillugu aallaammut tunngasut tamaasa ingammik aallaasip savissartua, imassallu allamut inissinneqartarnissai, aallaasit allanit susassaqaanngitsunit tiguneqarsinnaajunnaarnissaat allannguinnissaq siunertaralugu saqqummiussipput. Tassani qitiutinneqarluni sillimaniarneq annermik eqqarsaatigineqarluni. Illoqarfinni, imaluunniit nunaqarfinni ukiuni arlalinni arlaleriarluni piffinni assigiinngitsuni inuaqatigiinnut toqqissisimanngitsitsineq, toqutseriarnerit, imminut toqunnerit, kiisalu inuaqatigiinni erisaarinerit, toqutsinerit pinaveersaartinniarlugit allannguiffiginiarneqarpoq.



Taakkua pisartut aallaavigalugit inuit pineqartut tamarmik aallaasinik pigisallit piumasaqaateqarfigilernissaat uani aamma pineqarpoq, tassani ersarinnerulissasoq anguniarneqartoq tassaasoq, aallaasit sakkugalugit inuit allat tiguisimappata taava pinerluttunngortinneqassanersoq aallaasimik piginnittoq. Pinerluttunngortitsinissat arlallit pilissapput.

Soorunami aallartoornerit tamakkua pinngitsoorniarneqassasut uani inatsisissami tapersernarput.

Uani aamma ilitersuisarnek ilinniutissatut inunnut aallartittariaqassaaq, taavalu qaammarsaaneq nuna tamakkerlugu ingerlaanneqartariaqartoq naleqqamiit isumaqarpugut.

Naggataatigut uagut nunatsinni inatsit sulii taanna tamakkiisumik tigunikuunnginnera uggorisorujussuarput. Nunatsinni inatsisit atuuttussat eqqartoriarlugit Folketingimut suliaqutigeqqittarpagut.

Piniarneq taama nunatsinni pingaartigitillugu tamakkua uagut isumagisassaraluagut nammineq uagut immitsinnut aallaavigaluta, nunatta inui aallaavigalugit, nunarput tamaat ataatsimut isigalugu aaqqissuussaasumik inatsisiliorsinnaasassagalaratsigit, allanut miloriuttaqattaarnagu. Akunermiliuttoqaqqaarluta piuarneqarput ajorpoq. Uagut tamakkua isumagilerniartigit nammineq.

Uani inatsisissami maluginiarneqartussat ilagaat inatsiseqarnermut ministereqarfiup aallaasit eqittaannakkat pillugit inatsimmi unioqqutaalernissai innersuussutigineqartoq. Imaappoq inatsit taamatut atuutillerpat kalaallit nunaanni aallaasit eqittaannakkat qallunaatut *halvautomatisk*-iusut tamaasa atoqqusaajunnaassasut ministereqarfiup anguniarniarpaa.

Taamaassappat uumasunik toqutsigasuarnissamut uumasunik illersuisoqatigiit piumasarisartagaat atorunnaassaaq. Tassami piniakkat angisuut soorlu tikaagulliit piniakkallu arferit allat piniartarnerini toqunneqarasuarnarnerini aallaasit atorneqakkajuttarput. Taava aamma taassuma inatsisissap taamatut atuutsinneqalerpat pigeqqusaajunnaassappata illorpassuit misissorneqassappat?

Naatsumik taamatut naleqqamiit oqaaseqarluta, ataatsimiitsitaliami susassaqtartut peqqissaartumik suliarineqassasoq innersuupparput. Tamannalu tunngavigalugu aamma Ataatsimiitsitaliamut ilaasortanut kaammattuutigerusunnarpoq Aalisartut Piniartut Kattuffiat KNAPK pinngitsoorani apersorneqassasoq. Maluginiarlugu uani pineqartumi takuneqarsinnaammat tusarniaanermi ilanngussani allaqqasoqanngimmat KNAPK ilaatinneqanngitsoq.



Taamatut oqaasertalerlugu ataatsimiitsitaliamut susasaqartumut ingerlateqqinneqarnissaa innersuupparput.